

# Usuku Lomhlaba Lokufunda Kuzwakale NeNal'ibali



**nalibali**  
KUGALA  
**NGENDABA**  
EXOXWAYO.




## olweziNgane Ezincane!

Kulo nyaka sithanda ukumema imindeni nabanakekeli bezingane ezincane ukuba bafunde kanye nathi ngoSuku Lomhlaba Lokufunda Kuzwakale, ngomhla ka-7 kuNhlolanja 2024 – kanye nangazo zonke izinsuku. Indaba yethu ekhethekile, ethi *Ikati Elincane Elilahlekile*, ibhalwe nguStacey Fru futhi yafakwa imifanekiso nguRico. Leli khadi lendaba lingelakho ngokukhethekile!

### Ngaphambi Kosuku Lomhlaba Lokufunda Kuzwakale

- Yazi kahle indaba kangangokuba ukwazi ukuphinde uyixoxe noma uyifunde kuzwakale ngendlela yakho.
- Cabanga ngendlela ongayenza ngayo iphile indaba. Nquma ukuthi yikuphi ukunyakaza kobuso nokomzimba ofuna ukukusebenzisa.
- Khetha isikhathi osukwini ukuze uxoxe indaba lapho umndeni wakho wonke uhlangene.
- Thola izingxenywe zendaba lapho izingane zakho zingahlanganyela khona, isibonelo, zingenza imisindo eyenziwa yikati elincane nenja.
- Prakthiza ukuxoxa noma ukufunda indaba kuzwakale



### Ngaphambi kokuba ufunde indaba izwakale

- Sika ukhiphe izithombe zezilwane ezinjengezinja, amakati, onogwaja nezimfudu ezingase zifuywe zibe yizilwane zasekhaya. Vumela ingane ngayinye ukuba ikhethe isithombe esizoba yisilwane sayo sasekhaya ukuba isibambe kuyilapho wena ufunda indaba.
- Buza imibuzo noma uxoxe ngezinto ezizosiza izingane zakho ukuba zigxilise ingqondo endabeni. Isibonelo, bonisa isithombe sekati noma ikati elincane. Xoxa ngezilwane esizifuyayo zibe yizilwane zasekhaya.
- Funda isihloko sendaba. Buza, "Ucabanga ukuthi le ndaba iphathelene nani?"



### Lapho ufunda indaba kuzwakale

- Njengoba ufunda indaba, buza izingane zakho imibuzo ngayo. Imibuzo enjengokuthi, "Ucabanga ukuthi kungani enze lokho?" nokuthi "Yini wena obungayenza?" ithuthukisa ukuba nozwela kweziningane zakho ngabanye abantu kanye nokubaqonda.
- Yenza ukuba izingane zakho zihlanganyele ngokwenza imisindo eyenziwa yizilwane. **the sounds that the animals make.**



Yenza isithembiso sokufunda kuzwakale ndawonye njengomndeni kulolu **Suku Lomhlaba Wonke Lokufunda Kuzwakale** – nansuku zonke. Bhalisa ku [www.nalibali.org](http://www.nalibali.org) noma uthumele nge-WhatsApp igama elithi "WRAD" ku **0600 44 22 54**. Umndeni ngamunye obhalisayo uzoba nethuba lokujoyina **umkhankaso womndeni wokufunda woSuku Lomhlaba Wonke Lokufunda Kuzwakale leNal'ibali**. Uzothola izindaba ezengeziwe kanye namacebiso nemibono yendlela ongefunda ngayo nezingane zakho unyaka wonke.

# Ikati elincane elilahlekile



Indaba nguStacey Fru ☺ Imidwebo nguRico



NgoLwesihlanu ntambama, uNeo noBella babedlala engadini yakubo kaNeo. UNoodle wayezilalele ngokuthula.



Miyawu, miyawu, miyawu! **Ikati elincanyana elijinja lanwabuzela liphuma ehlathini.**



**“Bheka, linomgexo omuhle oluhlaza okwesibhakabhaka entanyeni,” kusho uNeo.**

UNeo noBella balingenisa endlini.

“Mama, Baba, bhekani! Sithole ikati elincane engadini!” kumemeza uNeo.

“Kumele ukuthi lingelomuntu othile ngoba linomgexo oluhlaza okwesibhakabhaka entanyeni,” kusho uBella.

“Kumele sizame ukuthola abanikazi,” kusho uBaba.



“Kusasa singenza amaphosta **wekati** elincane elilahlekile. Mhlawumbe umnikazi uzowabona amaphosta,” kusho uMama.

UNeo wathola ibhokisi lezicathulo nejezi elidala wenzela ikati elincane umbhede ofudumele ngalo. UBaba walifunza ukudla futhi walinika amanzi ahlanzekile ngendishi enkulu.



NgoMgqibelo ekuseni, uBella wafika entathakusa. “Masenze amaphosta!” esho.


Benza amaphosta amane. “Masihambe siyowachoma,” kusho uBaba.

Okokuqala baya elayibhrari...

base beya esitolo ...

bese umakhelwane wabavumela

ukuba bachome iphosta esangweni lakhe.



Bagcina iphosta eyodwa ebazoyichoma esikoleni.

NgoLwesibili ntambama, uNeo, uBella, uNoodle nekati elincane babedlala egunjini lokuphumula. Qoqoqo! Kwakunomuntu emnyango.

UNoodle wakhonkotha ngenjabulo.

Ikati elincane lathuka laze lagijima layocasha ngaphansi kukasofa.



“Sawubona,” kusho uNeo lapho ebona intombazane emnyango.

“Sawubona, igama lami nginguGina,” kusho le ntombazane.

“Ngcabanga ukuthi ikati elincane enilitholile ngelami. Igama lalo nguGinger.”

Kodwa lapho beya egunjini lokuphumula, ikati elicane lalingabonwa nangokhasha. “Hhayibo kahleni!” kusho uBella. “Kungabi ukuthi seliphinde lalahleka futhi ikati elincane!

UGina wabukeka edabuke kakhulu.

Base bezwa uNoodle ekhishini. Wu, wu! Lokhu kwalandelwa NGUKUBHAKLAZEKA okukhulu!







Izingane zaphuthuma ekhishini. Nalo lihleli lapho ikati elincane. Lalishayise indishi yamanzi yawa ngenkathi uNoodle ekhonkotha futhi manje lase limanzi nte.

UBella walomisa wabe eselinika uGina.

**Nyawu, nyawu, nyawu.** Ikati elincane lalijabule kakhulu!

“Wena noNeo namukelekile ukuvakashela uGinger noma nini lapho nithanda,” kusho uGina.

Ubuso bukaBella bachachamba. “Siyabonga!” esho.

“Kodwa,” kusho uNeo, “Ngicabanga ukuthi uNoodle kufanele asale ekhaya.”

Bonke bavuma ukuthi lona cishe kwakungumbono omuhle kakhulu.



Ngemva kokufunda indaba ndawonye, xoxani ngokuthi yini eyenzekile endabeni. Buza imibuzo ukuze ukhuthaze izingane zakho ukuba zicabange futhi zikhulume ngemibono ehlangene nendaba, isibonelo, “Iyiphi ingxenye oyithanda kakhulu kule ndaba?”

## Yenza indaba ihlabe umxhwele!

- 🐾 Cula ingoma noma uqambe ingoma emayelana namakati nezinja
- 🐾 Dweba isithombe sengxenye oyithandayo yendaba.
- 🐾 Sebenzisa inhlama yokudlala noma ubumba ukwenza umfanekiso kaGinger noma kaNoodle.
- 🐾 Yenza iphosta yesilwane sakho esifuyiwe ekhaya noma isilwane sasekhaya ongathanda ukuba naso. Dweba isithombe sesilwane sakho esifuyiwe ekhaya. Bhala noma ucele othile ukuba akusize ubhale umbala negama lesilwane sakho esifuyiwe ekhaya.



Bonisa izithombe namavidiyo akho nezingane zakho nijabulela uSuku Lomhlaba Lokufunda Kuzwakale nemidlalo yakhona [#nalibaliwrad2024](#) engosini yethu yezokuxhumana!

TheNalibaliChannel

nalibaliSA

@nalibaliSA

@nalibalisa

@nalibalisa

nalibalisa

The Nal'ibali Trust

+27 64 801 5496

**INal'ibali (igama lesiXhosa elisho ukuthi “naye indaba”) umkhankaso kazwelonke wokujabulela ukufunda. Isifiso sethu ukubona iNingizimu Afrika lapho ingane ngayinye ijabulela ukufunda indaba nsuku zonke.**



IsiZulu